



SAMBAND ÍSLENSKRA SVEITARFÉLAGA

Mennta- og menningarmálaráðuneytið
Sölvhólsgrötu 4
101 Reykjavík

Reykjavík 18. apríl 2018

1804025SA VÓHS
Málalykill: 00.64

Efni: Umsögn um drög að reglugerð um sjálfstætt rekna grunnskóla

Vísað er til tilkynningar á vef mennta- og menningarmálaráðuneytisins frá 26. mars sl., þar sem óskað var eftir umsögnum um drög að reglugerð um sjálfstætt rekna grunnskóla.

Almennt um reglugerðardrögin

Starfshópur innan ráðuneytisins hefur unnið að heildstæðum drögum að reglugerð um sjálfstætt rekna grunnskóla samkvæmt 43. gr. grunnskólalaga nr. 91/2008. Sérstakt samráð hefur verið haft við Samband íslenskra sveitarfélaga og leggja fulltrúar þar til að samráði verði fram haldið að loknu opnu samráði á netinu um reglugerðardrögin.

Nemendur með lögheimili í öðru sveitarfélagið

Sambandið tekur undir athugasemdir í umsögn Reykjavíkurborgar um ákvæði 2. gr. og 7. gr. reglugerðarinnar, þar sem hvergi er getið hvernig fara skuli með mál þegar sveitarfélög greiða framlag vegna nemenda sem ganga í sjálfstætt rekna grunnskóla í öðrum sveitarfélögum. Þrátt fyrir að fjöldi nemenda sé mismunandi á milli sveitarfélaga, þá er engu að síður mikilvægt að fram komi í reglugerðinni hvernig skuli fara með framlag vegna þessara nemenda og hvernig tilhögun þjónustusamnings skuli háttað og hvort þörf sé á staðfestingu Menntamálastofnunar.

Um form og efni þjónustusamnings

Með lögum nr. 76/2016 um breytingu á lögum um grunnskóla nr. 91/2008, var sett nýtt ákvæði í 33. gr. a sem kveður á um að öllum börnum í yngri árgöngum grunnskóla skuli gefinn kostur á þjónustu frístundaheimila.

Með hliðsjón af fyrrnefndu ákvæði 33. gr. a, sem og ákvæði 43. gr. laganna, er gert ráð fyrir að þau börn sem sækja sjálfstætt rekna grunnskóla skuli einnig eiga kost á þjónustu frístundaheimila. Sambandið leggur til að um þá þjónustu verði jafnframt fjallað um í 3. gr. reglugerðarinnar sem hluta af áherslum í þjónustusamningi um starfsemi viðkomandi grunnskóla.

Í þjónustusamningi skal jafnframt leitast við að tryggja réttaröryggi barna og að framkvæmd lögboðinnar þjónustu verði ekki stefnt í hættu. Þannig er mikilvægt að þjónustusamningur tryggi sveitarfélögunum viðeigandi nýtingar- eða afnotarétt af fasteignum og mannvirkjum sjálfstætt rekens grunnskóla, svo lögboðin verkefni sveitarfélags verði rækt, sbr. 67. gr. sveitarstjórnarlaga nr. 138/2011.



Lokaorð

Þá tekur sambandið undir með þeim fyrirvara sem Reykjavíkurborg fjallar um í umsögn sinni um 9. gr. reglugerðarinnar um upplýsingagjöf og eftirlit með starfsemi. Skýra þurfi betur í ákvæðinu hvernig fara skuli með persónugreinanlegar upplýsingar þeirra nemenda sem sækja grunnskólanám í sjálfstætt reknum grunnskóla utan lögheimilissveitarfélags.

Samband íslenskra sveitarfélaga áskilur sér rétt á að koma að frekari athugasemdum að loknu opnu samráði um drögin og óskar jafnframt eftir því að eiga fund með fulltrúum ráðuneytisins.

Virðingarfyllt

SAMBAND ÍSLENSKRA SVEITARFÉLAGA

Karl Björnsson
framkvæmdastjóri